

草堂嗣響
貞



草堂嗣響卷四目錄

長調下

綺羅香 百四字
三首

花心動 百四字

消息 百四字

瀟湘逢故人慢 百四字

霓裳中序第一 百四字

喜遷鶯 百四字

二郎神 百四字
二首

南浦又一體 百五字
三首

合歡帶 百五字

秋霽 百五字
二首

尉遲盃 百五字
三首


清江裂石 百五字

曲玉管 百五字

望梅 百六字

飛雪滿羣山 百六字

解連環 百六字
二首



泛清波摘徧 百六字

夜飛鵲 百七字

望海潮 百七字

一萼紅 百八字

薄倖 百八字

綠意 百九字

胥馬索 百九字

疎影 百十字

八寶粧 百十字

風流子 百十字

縵卷紉 百十一字

江南春 百十一字

五綵結同心 百十一字

離別難 百十二字

惜餘春慢 百十三字

蘇武慢 百十三字

小梅花 百十四字

洞庭春色 百十四字

沁園春 百十四字

八歸 百十五字

賀新郎 百十六字

摸魚兒 百十六字

金明池 百二十字

青衫濕遍 百二十二字

白苧 百二十五字

蘭陵王 百三十字

浪淘沙慢 百三十一字

大酺 百三十三字

西平樂 百三十七字

多麗 百三十九字

玉女搖仙佩 百三十九字

夜半樂 百四十四字

哨遍 二百二十字

戚氏 二百十三字

草堂嗣響卷四

錫山顧彩天石編輯



鐸振路

闕里孔傳

鉅西銘

全定

長調下

綺羅香

螢

宋牧仲

借草生情。因風弄影。熠燿飄來何處。個個輕盈。點綴秋
光無數。纔亂穿小幔疎簾。又暗點空墻廢圃。似從他狡
獪天孫。繁星洒作夜深雨。佳人輕把扇子撲取。青苔
砌上。玉纖籠住。淒切寒蛩。妬殺流輝遲暮。怕燭至暫歛

微明綴庭柯。又成珠樹。最堪憐。數斛量來。徧山巖放去。

又前題和牧仲

朱錫鬯

挾火微溫。侵星易墜。留拂井梧簷樹。傍牖依欄。暗裏慣
窺人住。渾不辨霧鬢殘粧。又何況襪塵纖步。際新涼團
扇初閒。輕輕撲付小兒女。歲蕤深鎖靜院。携照相思
錦字。練囊縫取。憑仗微風方便。更教飛去。逗屋角蛛網
圓絲。避葉心豆花斜雨。恣意向月黑池塘。夜深高下舞。

又將發臨汝卽席有贈

陳曾起

消盡吟魂。牽將別緒。偷向銀箏低訴。歌斷雙鬟。不擬此
情輕負。乍一縷兩縷衣香。又無痕有痕眉嫵。問天涯醉

了誰憐。袖邊添得淚如雨。狂朋清興未減。猶自垂瓊
帳底。重尋笙譜。愁絕風鳶未了。夢中心苦。照離席蠟炬
成灰。點征袍雪花飛絮。便金鞭裏手拈來。看人騎馬去。

花心動

彭羨門

幾陣西風涼氣滿。林下乍收殘暑。極目江天。蹴雪驚沙。
千里迢迢吳楚。殷勤謝茱萸灣水。爲儂好向秦溪去。還
恐怕關山重疊。雙魚無據。冉冉年光欲暮。正思歸未
得。含情誰語。待折疎華。寄取一枝。又遠隔層城路。倚樓
人聽斷腸聲。悲秋客到傷心處。江南夢。一曲瀟瀟暮雨。

消息 度雁門關

朱錫鬯

千里重關。憑誰踏遍。雁啣蘆處。亂水滄茫。層霄雪嶺。鳥道連勾注。畫角吹愁。黃沙拂面。猶有行人來去。問長途。斜陽瘦馬。又穿入離亭樹。猿臂將軍。鴉兒節度。說盡英雄割據。竊國真王。論功醉尉。世事都如許。有限春衣。無多山店。酌酒徒成虛語。垂楊老。東風不管。雨絲烟絮。瀟湘逢故人慢。社集分賦得天連秋水一人歸

顧天石

河梁分手。正殘蘆灞岸。衰柳秋江。離人意難忘。木蘭艇昨夜偷繫橫塘。四更月落。聽吳歌。欸乃淒涼。推篷看。霜凄烟淡。不知身在瀟湘。孤帆去。無伴侶。又迢迢天連

野水俱長。爭忍不思量。更誰與同斟。別酒離觴。情人此際凝紅淚。獨倚西窓。題箋寄燕鴻。無便。何時得到衡陽。

霓裳中序第一 咏龍髮

曹實菴

崢泓勢猶怒。誰向層波剪冰箸。憶當日青天乍擘。曾伴火鬣朱鱗。度雲穿霧。清秋島嶼。抱驪珠。濃睡腥雨。莫也是洧淵戰罷。飄落翠蓬路。羈旅生涯如許。還藏得鮫宮幾縷。輕綃鈿合。潛貯怕一夜驚雷。破壁飛舞。何人拾鳳羽。便鬪草休教換去。他年事。天風鶴背。拔下又重數。

喜遷鶯 寄題鮑聲來草亭

李武曾

隱囊紗帽。有畫裏數椽。柘湖清杏。松子香邊。藤陰架底。

深護一欄芳草。似整如斜。雲根小疊。落花慵掃。休嫌窄。
看移茵着屐。儘容吟嘯。捲簾湖色繞。比鏡水山陰。輞
水藍田好。未識君時。曾經此渡。門外幾楓殘照。許我結
隣否。便料理烟蓑垂釣。君且去。待白蘋風起。故人船到。
二郎神 出郊城西郊 陳曾起

寒驢破帽。向晚去誰村舍。聽一片西風。吹來芋圃。淒絕
啼螿徧野。幾點牽牛疎籬外。翠不到夕陽西下。便網得
黃鸝。撲將紅棗。荷鋤歸罷。堪訝。何來此客。鞭絲長把。
莫負了江南。采菱歌斷。容易芙蓉雨打。縮項初肥。長腰
正軟。門巷薄霜如畫。笑此際燈火。郊檐好。盼役車休也。

又 燕子磯晚眺

朱近修

岷峩萬里。渺渺水流東注。指遠近關山。參差宮闕。起滅
長空烟霧。南望滄溟天邊影。辨不出微茫盡處。歎三楚
英雄。六朝王霸。消沉無數。從古長江天塹。飛艤難渡。
自玉樹歌殘。金蓮舞罷。倏忽升沉烏兔。燕子堂前。鳳凰
臺畔。冷落丹楓白露。但坐看狎鷗隨浪。漁父扁舟朝暮。

南浦又一體 秋水

曹實菴

片月映寒汀。碧澄澄人對江山清曉。綠淨遶柴扉。晴磯
上。已有垂楊先掃。蘆花似雪。連拳鷺占圓沙小。淡抹遙
天剛一色。夾岸粘雲衰草。百川爭赴長河。看漁床燈

草堂詩集卷四
火黃昏近了。白露老蒹葭。清歌發無數。采菱船到平湖
浩淼。芙蓉落盡空潭悄。又是霜明波冷後。此際撈蝦人
少。

又 滕王閣

宋牧仲

高閣尙巍然。背江城俯瞰東流朝暮。雙槳溯波來。登臨
好。襟帶風烟無數。斷霞縹渺。孤飛猶是當年鷺。潭影悠
悠。渾不定。送盡幾番歌舞。最憐詞客消魂。有殘碑剝
落。半畝古礎。勝地走戈鋌。帆檣集。乍息一天鞞鼓。倚闌
呼酒。黃昏還聽濤聲怒。歸去篷窗明月上。照我醉眠南
浦。

又 舍東大士禪院吾家廢園也飲翠閣巋然獨存
烟雲竹樹頗擅登眺之勝今春爲風雨所敗草
之併題

陳曾起

蔓草胥荒莖。剝雕欄幾簇牡丹芽細。傑閣尙排空。溪雲
上。飲盡無邊幽翠。斜陽過雁。掠波還趁東風起。但記年
時明月夜。曾逐舞裙垂地。微塵千劫難消。又香殘貝
葉。禪關深閉。愁絕舊家郎。無情曲。送到一天清淚。頽垣
敗壁。手題難盡淒涼意。留取堦前疎竹影。冷挂月明如
洗。

合歡帶 秦淮聞歌

彭爰琴

憶秦淮三百年來。脂粉窄。管絃堆。白唱家山入破後。悵

歌衣舞帶成灰。忽過清溪。檀槽乍撥。邏迤相催。聽舊人
遺伎。潛然珠淚。不覺盈腮。徐摘銀甲。暢倒金壘。此時
此際徘徊。幡綽新磨消歇久。最傷心。汾雁宮槐。知音白
首。邊聲太急。河滿多哀。只南朝玉樹聲中。幾換結綺樓
臺。

秋霽

曹實菴

過雨長天。早露重閒堦。新月如沐。射角明河。垂簷珠斗。
苔影上人眉綠。流螢誰撲。霜紉小扇銀塘曲。渾無寐。風
度藥欄。戛戛響修竹。漏殘酒醒。篆冷烟銷。隱壁秋蟲。
似伴幽獨。拂莓苔花香作陣。秋蘭綽約疑空谷。故園難

窮千里目。悠然歸興。只在黃葉村中。白蘋香裏。數間茅
屋。

又嚴子陵釣臺

朱錫鬯

七里山光。見擁樹歸雲。石壁殘照。漁火猶存。羊裘未斂。
只合此中垂釣。客星曾老。笑來無過烟波好。况有個偕
隱市門。仙女定娟妙。當此更想。去國叅軍。白楊悲風。
應化朱鳥。翠微深。鷓鴣飛處。半林茅屋。隱秋草。歷歷枕
樓人影小。水遠山遠。君看滿眼江山。幾人流涕。把莓苔
掃。

尉遲杯

許月度自金陵歸以青溪集示我感賦

陳其年

青溪路。記舊日年少嬉遊處。覆舟山下人家。揮扇渡頭
士女。水花風片。有十萬珠簾夾烟浦。泊畫船柳下燈前。
衣香暗落如雨。聞說近日臺城。剩黃蝶濛濛。和夢飛
舞。綠水青山。渾似畫。只多了幾行秋戍。三更後盈盈皓
月。見無數精靈含淚語。想胭脂井底嬌魂。至今怕說擒
虎。

又七夕懷靜憐女史

朱錫鬯

吳綾白。偏愛縫雙袖。鴉翎黑。多應北里新粧。怕墮尋常
標格。微風簾額。看露葉中庭盡秋色。記鱗鱗月底疎雲。

曾照勾欄吹笛。一自細馬馱歸。剩羅帕當時。別淚偷
拭。最恨初鴻。啣蘆塞上。不遞愁人消息。枉飛度河橋山
驛。想柳外高樓長如昔。更何年並坐穿針。六度淒涼今
夕。

又廣陵劉宗一席上贈女史

顧天石

凌波步。記馬上墻頭送回顧。生成一捻宮腰。曾試翠盤
歌舞。襪羅清冷。悄立向紅屏最深處。羞被他月姊迴廊。
等閒窺見眉嫵。雖則嚙笑承恩。未暇薦陽臺。雨雲朝
暮。翠袖香綿偷搵淚。是酒冷燈殘心緒。君不記彩箋題
句。多半爲盈盈隔秋浦。又何因細馬馱來。夜寒空放歸

去。

清江裂石

人日送大鴻由平陵之皖桐

陳其年

彩燕粘鷄鬪酒天。輕軟到釵鈿。准擬暗塵元夜。覓羅帕
月底燈前。訝解艇來迎何太早。綠帆拖雨。貪看水成烟。
殷勤問。姑溪瀨水。可似瀾湖妍。二月向龍眠。縱陽城
下。可還有仕女鞦韆。西望是潯陽。琵琶亭廢。見說道邊
愁已入新年。對春風倚江樓。倘遇鯉魚紅尾。寄我碧桃
箋。

曲玉管

孔西銘

滿葉初長。榴花新放。桐陰篩碎閒庭滿。窗外疎篁解籜。
半拂闌干。忍相看。玉鏡塵封。金猊香燼。燕來燕去。啣花
瓣。午夢醒時。多少離緒相關。遣愁難。寂寞如今。怎知
我湘簾影裏。低徊盡日。神情都馳遠水。遙山竟無言。聽
迴廊茶沸。夾和池塘蛙鼓。聲聲愁絕。總是思量。寄與冰
絃。

望梅

題徐渭文鍾山梅花圖

曹南耕

真龍曾降。記千門的爍。九重宏敞。種鍾山萬樹梅花。想
舊日東風。一夜都放。寶馬香車。爭先出烏衣門巷。更宸
游十里。綴雪含珠。香浮仙仗。如今有誰吟賞。料當初

花塢盡成榛莽。忽憑君幾尺丹青。恍玉闕猶存。瓊枝無恙。夢遶秦淮。又誰把興亡低唱。只一天明月。還照數峯江上。

飛雪滿羣山

孔西銘

黯黯彤雲。霏霏六出。夜來肥了梅梢。玉欄乍倚。珠簾半控。睡眠猶怯光搖。看青山盡老。沒蟻路羣峯漸高。桑田一色。樵子漁父。忘却舊溪橋。人都說今年寒信早。獨眼獨恨。被冷香消。疎櫺無奈。冰澌遍洒。看看浸透吳綃。向無情筆硯。頻呵凍相思怎描。歲華誤了秦娥。心事在瓊簫。

解連環

咏蘆花

曹實菴

驚風淒切。滿江干一片。凍雲吹折。飄萬點不辨東西。枉賺得行人。髣髴添雪。明月光中隱。沙岸鴻聲清絕。更閒隨釣艇。暗入柴門。伴人騷屑。助他怒濤嗚咽。捲興亡舊恨。浪花明滅。笑垂楊只解飛綿。難點上征衫。迷離成鐵。露冷蒹葭。還記得綠芽如髮。問故家秋娘何在。風流搃歇。

又

孔西銘

蕭條淒切。聽蛩吟斷續。似訴悲咽。縱塞雁能寄音書。被烟阻霧迷。也應愁絕。枕冷衾單。鎮虛却半床明月。看辭

巢社燕。恍記別離。正是今日。又將重陽時節。被滿城風雨。做就紅葉。誰承望如許。淒涼。把翠倚紅圍。盡數拋撇。千里蕭郎。可念我深閨寒怯。撥金爐殘灰未燼。爲誰心熱。

泛清波摘遍

沈融谷

陰陰三月。漠漠江梅。猶見冷花還着樹。短亭斜日。未是東風送君去。傷春處。啼鶯織柳。語燕梳烟。別院曲終愁聽雨。如此征衫。那禁輕寒。漂泊如許。空庭暮。梨花正如故人夢裏。橫塘南浦。莫上紅樓。捲簾便聞杜宇。甚情緒。上巳一詠一觴。蘭亭觴味儔侶。肯負天涯碧草。相思

歸路。

夜飛鵲

赤壁

孔振路

英雄老橫槩。醜酒淋漓。唱道烏鵲南飛。三分割據豈吾願。舳艫百萬旌旗。如何正慷慨處。忽天空夜靜。月朗星稀。樂極悲生。問何人識此兵機。終古烏林赤壁。歎豈子成功。江介難窺。未到銅臺買履。雄心先斷。繞樹無依。他年鵲去。化橫江鶴影來西。筭霸王事業。漁樵感慨。誰是誰非。

望海潮

龔芝麓

江山如此。年華依舊。分明又度春宵。銀鴨吐香。蓮銅滴

月朱欄瘦拂長條。閒倚玉屏腰。見髻雲送懶。羅襪藏嬌。
怕被花窺。一天風露近藍橋。幽情慣是無聊。記青綾
寵愛。紅研丰標。隋苑鶯殘。吳宮月冷。蒼茫昨日今朝。清
夢轉迢迢。望碧天草色。烟雨淒遙。無計留春。淚絲偷印
美人蕉。

又 秋登吳山

丁雁水

西陵草短。南屏霜重。登臨客思方賒。江湧銀鰲。潮喧鐵
馬。千年洗盡繁華。落日岸烏紗。危欄空拍遍。幽恨無涯。
葛嶺樓臺。吳山宮殿。有啼鴉。當年競鬪豪華。任玉津
載酒。翠舫迷花。栢樹墳高。木棉人去。獨松亂起鳴笳。鳳

舸載宮娃。明湖歌舞路。冷浸雲霞。惟見孤山。舊時寒月
照梅花。

又 題馬貴陽画册

陳其年

極北龍歸。江東馬渡。君臣建業偏安。天上無愁。宮中有
慶。聲聲玉樹金蓮。點綴太平年。更尙書艷曲。丞相蠻牋。
月夕花朝。那知王濬下樓船。華清月照闌干。悵多時
粉本。流落人間。可惜當初。丹青妙手。如何不画凌烟。風
景極淒然。寫一行衰柳。幾處哀蟬。展卷沉吟。昏鴉蔓草
故宮前。

又 蘆溝橋

顧天石

霜飈夜吼。驚湍曉駛。黃埃不盡漫漫。明駝蹀躞。羶車輾。人言此是柔乾。閒數石闌干。看蒼龍古脊。劍戟鋒攢。去國初程。馬蹄新試踏冰寒。平沙海濶天寬。見幾行雁落。數隻鷓鴣盤。袖手墮鞭。呵鬚成雪。青帘縹渺林端。風緊射眸酸。念征塵影裏。漸遠長安。變徵歌聲。至今猶似髮冲冠。

又 錢唐懷古

彭爰琴

錢唐江上。千年遺恨。天風怒蹴銀濤。王有錢鏐。臣惟趙構。山河枉說南朝。十里六條橋。且花間錦檝。柳外瓊簫。錯認杭州。故京宮殿在蓬蒿。畫圖一幅生綃。竟吳峯

立馬。越寢啼鴉。鐵券空藏。金牌盡送。休嫌大海枯潮。滿眼又弓刀。只岳墳于墓。對峙雙高。何處冬青。穆陵殘樹。幾番樵。

一萼紅 吳苑

顧天石

下斜陽。是誰家燕子。相對語興亡。幾曲蒹葭。一泓秋水。石湖烟靄茫茫。回首望長洲故苑。有幾株銀杏出頽墻。霸業何存。繁華摠逝。臺址都荒。况值暮秋天氣。漸吳江楓冷。漁浦淒涼。菊蕊黃時。桂枝凋後。蘭橈尙轉橫塘。城角外寒鴉數點。爲故園描出舊垂楊。誰念蒼苔眉嫵。老盡真娘。

又 咏臘梅

傅舞音

步前村。怪梢頭春破。不返舊冰魂。夜雪空埋。檀唇半暈。安排金屋黃昏。人共說春前名字。樓東事幾度。賦幽恨。苔榦風疎。鵝黃酒煖。瘦影窺樽。無限溪邊風度。向枝南枝北。渲染初勻。素紙屏深。迴廊月淡。一枝醉眼偏真。還惆悵冷香拈罷。惹金粉吟袖帶餘薰。終不似秋叢處。獨立籬根。

薄倖

彭爰琴

華胥歸去。又未許醉鄉留住。奈多少五更心事。記起十年情緒。想出門掉臂天涯。青鞋布襪。憐行路。但市上吹

簫。江邊垂釣。誰辨人間虎鼠。看碌碌皆餘子。豈屑與絳灌爲伍。把不情歌哭。無端哀樂。都分付青山黃土。浮生真誤。對參橫月落。吾醒而在頻起舞。黑甜白墮。此內茫茫今古。

又 觀玉茗堂南柯記

顧天石

槐安宮殿。是何代帝王封建。憑空幻南柯郡守。不隸神州赤縣。最堪思貴主瑤芳。青槐花底迴歌扇。只半霎斜陽。一聲蟬噪。了却三生夙願。記從獵龜山日。有麗賦處士曾獻。歎如此文藻。人間埋沒。向蟻國光芒纔現。堪憐司憲。竟英雄失路。醉卧沙場空百戰。醒來酒煖。雨過

槐陰綠遍。

綠意 梅花書屋

孔西銘

愛他清絕。任輕風掃淨。竹墻蘿壁。剩有孤芳一樹。犯寒
微逗。早春消息。雪窻昨夜糊新紙。似故把梅魂疎隔。弄
香常傍簾旌。慣得邀人憐惜。瘦影翩翩。月姊應飛下。
渲染三分瑩白。命酒觴余。更約狂朋同賞。畫欄今夕。曉
看霜雨凝紅葢。知為甚。淚流成滴。他道是有限春光。莫
待江城吹笛。

又 前題和西銘翰博

顧天石

嫩紅脆綠。向小窻靜處。娟娟如玉。還帶江南雪意。春心

未展。暗香猶感。主人慣得憐幽賞。又早與安排金屋。任
教孤影橫來。不間一株松竹。入夜逾清。花底正遊燕。
莫奏關山笛曲。記傍溪橋。一樹娉婷。偏解助人幽獨。如
今十二闌干遶。是別樣精神裝束。待捲簾春露收時。看
取梅妃新浴。

胥馬索 送崔魯瞻再遊黔中兼懷李斯年

朱錫鬯

玉驄嘶。須把青絲胥他住。燕歌易酒。莫辭今日離亭聚。
浮雲一望。綠波千里。滿目消魂江淹賦。計落花時節黃
陵。楚竹湘烟響柔櫓。行旅。羅施天末。木瓜金筑。且伴

參軍作蠻語。亂水孤舟逢人少。惟有冷猿昏雨。南尋李
白。問訊何如。爲報頻年相思苦。道故人別來詩卷。總是
人間斷腸句。

又 走馬燈

蔣京少

拓蟬紗。幻作桃花帳中舞。青絲紫絡。匆匆不夜城邊度。
汗血奔雲。霜蹄掣電。好試騰驤孫陽顧。笑一場過隙光
陰。也賭春風踏花去。難駐。啣枚疾走。連鑣緩控。最怕
烟銷露凝處。白袷紅裳相偎久。餘煖香韉誰護。暗塵飄
盡。嘶影都無。况復依稀章臺路。漫怨他落燈風緊。剪燭
西窓夜深語。

又 元夕題畫屏踏歌美人

顧天石

動春纖。一般解按梁州拍。華燈閃處。驚鴻髣髴影翩然側。
鸞音遙送。鳳管潛吹。彷彿聲從屏間出。經幾年舞袖弓
腰。還似娉婷舊顏色。淒寂。歌闌宴罷燈昏人去。誰與
溫存度。今夕。明月來窺簾幃悄。剩有衫痕粘壁。前身應
是燕子樓人。舞榭歌臺長拋擲。過上元瑤箱疊起。鈿委
花殘更誰惜。

疎影

朱錫鬯

西風馬首。有哀蟬幾樹。高下聲驟。村外烟銷。水際沙寒。
斜陽似戀亭埃。絲絲縷縷紛堪數。更彷彿葉初開候。待

月中桂影東西。思共故人携手。搖落江潭萬里。繫船
酒醒夜長。笛京口。讀曲歌殘。曉露翻鴉。蕭瑟白門非舊。
赤欄橋畔。流雲遠。遮不住。短牆疎牖。話六朝遺事。凄然。
張緒近來消瘦。

又 蟬磯弔孫夫人

顧天石

怨紅悴綠。想孫郎小妹。於此埋玉。虛嫁英雄。不了生平。
歸來日暮。空谷。昭陽粉黛他人事。貯不到。蜀天金屋。縱
當時換得。荊州。畢竟是誰榮辱。宮婢長刀夾侍。剩神
鴉畫舞。白鷺宵宿。環珮珊珊。想像魂歸荒墓。瓣香誰祝。
江流多少。胭脂淚。染不上。九疑斑竹。歎永安行殿。淒涼。

一樣鳥啼猿哭。

八寶粧

咏未央宮銅奩

曹寶菴

渭上西風。漁床晚照。鐵網千絲初舉。翡翠迷離。光映水。
一片苔痕。淒楚。咸陽遺製。花天月地。樓臺。蜂黃蝶粉重。
重護。細字蟲魚。繡斷依稀金縷。未央拋擲。何年。昆吾
村外。濕燐入夜。偷聚。慣點綴。鮫宮眉嫵。問飛燕。菱花曾
貯。思伴侶。銅駝陌上。聽盡黃昏。瀟瀟雨。筭流落人間。玉
箱也出。茂陵去。

風流子

成容若

平原草枯矣。重陽後。黃葉樹騷騷。記玉勒青絲。落花時

節曾逢拾翠。忽憶吹簫。今來是。燒痕殘碧。盡霜影亂紅。
凋秋水映空。寒烟如織。皂鵬飛處。天恹雲高。人生須
行樂。君知否。容易兩鬢蕭蕭。自與東君作別。剗地無聊。
算功名何許。此身博得。短衣射虎。沽酒西郊。便向夕陽
影裏。倚馬揮毫。

又

嚴蓀友

荀郎多恨後。魂銷盡。依約見傾城。正梅粉乍舒。舊家門
巷。柳絲斜舞。別樣才情。更幾度。玉釵寒撥火。銀甲夜調
笙。斗帳珠瑩。檀心偷展。鳳燈香炷。花睡難成。無端歸
去也。人何處。夢裏頻喚卿卿。空記鵝兒酒煖。杏子衫輕。

怕油壁西陵。風僂雨憇。美人南浦。綠怨紅驚。爲待蘭舟
催發。重聽流鶯。

又 題劉岱儒葭水山房

曹實菴

城南泥水路。蒹葭滿。白露曉蒼蒼。想茅屋數間。中央宛
在。青簑箬笠。何處鳴榔。漁歌發。斜風楊柳岸。細雨薜蘿
裳。鷺立晚汀。點開波面。鴉翻亂葉。界破殘陽。伊人高
卧處。有茶鐺丹竈。布被繩床。遙指軟紅十丈。應笑人忙。
似烟波釣叟。浮家泛宅。魚蝦結伴。雲水爲鄉。誰道桃花
片片。悞却劉郎。

幔卷綉

朱錫鬯

桃葉舟回楓林客去。西渚波千疊。見十里橫塘。幾陣涼
颼。獨上小樓。柔腸斷絕。春信鶯花。秋期河漢。總是愁時
節。悵碧海青天。夜色蒼涼。歸去明月。淒淒切切。相思
苦。夢雨何曾歇。恁不似當初。絳唇含笑。而今剩有。啼痕
淚頰。洛浦川長。青谿路斷。曉露風燈滅。但寄語江淹。有
個人兒。莫更輕別。

江南春

和倪雲林

陳其年

風光三月連櫻筍。美人躊躕白日靜。小屏空翠颭東風。
不見其餘見衫影。無端料峭深閨冷。忽憶青驄別鄉井。
長將妾淚洒羅巾。願作征夫車畔塵。人歸遲。春去急。

雨絲滿院流光濕。錦書道遠嗟何及。空守吳山一春碧。
何日功成還馬邑。雙倚枇杷花樹立。夕陽飛絮化爲萍。
攬之不得徒營營。

五綵結同心

元日壽內

孔振路

年華潛換。黍谷初吹。普天共慶時新。三十明初一。卿與
我。懸弧設帨之辰。春盤剪韭。胡麻飯。仙厨饌。兩日平分。
誠堪繼。梁鴻冀缺。齊眉相敬如賓。溯源鳳雛龍種。恰
通家孔李。百世良姻。螺黛眉描。椒花頌獻。綵幡重貼。宜
春。膝前兒女爭梨栗。塤篪奏。真樂無文。期貞靜。碧紗窓
裏。鷄鳴儆戒諄諄。

又乙卯冬杪與園次共飲惠山蔣氏酒樓翠袖紅絃談諧甚劇酒半忽過廣陵高生至記與山陰友人紅橋狎宴時匆匆已十三年矣故人萬里白髮千尋不禁昔夢迷離之感

陳其年

簾風暗裊。檻雪新晴。小樓月又剛圓。有杜秋娘在。微酣後。催弄脆竹零絃。曲中驀聽羊車到。塞帷入。一座喧闐。驚疑甚。似曾相識。別來一十三年。重新移燈添酒。笑夜長難睡。且話從前。記得當初。揚州薄倖。有人同做樊川。玲瓏去後。詩人老。湖湘客。漂泊誰憐。憑誰報。渡瀘諸葛。君家燕子依然。

離別難

孔振路

人去樓空。念和誰翠袖雙攏。鎖寒衾寂寞芙蓉。記當初笑語夜喁喁。又何事鳳隻鸞孤。鵲鵲比翼。各自西東。恨緣慳分淺。歡娛未畢。驚散落花風。花淡淡。月溶溶。隔簾聽譙鼓三鼙。想天涯觸目非故。但相思兩地與君同。唱一曲子夜吳歌。無人知我。幽恨填胸。無聊甚。十二闌干拍徧。和淚倚熏籠。

又

顧天石

浮世百年。笑幾多離合升沉。被風塵催老光陰。看長途車轍許多深。盡都是白髮蒙頭。黃埃撲面。名利關心。歎前車覆矣。後車不誠。觸事犯崎嶇。一斗酒。一張琴。遇

閒時犢背長吟。任朱門山丘華屋。且閒將風月靜中尋。
無那是一片壯懷。登高望遠。清淚潄潄。空拊髀。如此江
山物色。無計展胸襟。

又

孔西銘

一夜秋來。可奈添萬種離腸。又淒淒絡緯啼螢。似縑絲
聲只傍東墻。記當日繡幕高舉。金爐煖熟。清晝蘭房。有
茶烟鬢影。溫存相對。事事耐思量。登車去。淚千行。但
聲聲珍重難忘。便結成巫雲一片。怕魂來縹渺路岐長。
躑躅遍衰草古堤。霜華漸白。蝶粉都黃。相尋處。夢又因
風吹轉。拍斷枕痕涼。

惜餘春慢

吳城雨中

梁蒼巖

樹隱千章。風輕五兩。堤畔人家容與。柴門照水。沙岸連
檣。一片吳城烟雨。遙望曉捲疎簾。小婦凝粧。映窓眉嫵。
歎天涯客子。三千餘里。雁沉汀浦。空聞說白苧江東。
錦帆南國。顛倒醉鄉歌舞。寒林半落。霜葉猶紅。愁見鳧
鷗孤嶼。更羨高風此邦。孺子荒亭。雲卿黃土。問江山萬
古。茫茫今夜。夢歸何處。

又

萬紅友

碎滴簷鈴。重圍燈暈。耐盡一秋蕭瑟。聲來乍接。影去難
尋。夢斷曉雲無迹。離緒千絲萬絲。雖苦縈纏。未甘拋擲。

裏啼珠。欲倩秦禽吉了。向伊低說。從別後。渺渺河山。匆匆冰雪。又到杏花寒食。潮驚仄枕。月逗疎簾。疑是那。人孤立。長憶紅亭酒邊。幾點參旗。一聲風笛。便如今。忘却當時。淒斷。怎生忘得。

又 護花鈴

孔宏輿

惹悶時光。困人天氣。偏爲惜花起早。流鶯啄碎。乳燕啣殘。幾片落紅未掃。尋向園中。密枝佈滿金鈴。紅絲遍繞。趁東風吹起。可噹聲韻。送來林表。還勝似鐵馬鏗鏘。觸人愁緒。不管淚痕多少。雪衣翠羽。丹喙金翎。驚去別尋梁稻。莫怪吾儂情薄。昔日花奴。也愁春老。剩窻前浪

蝶遊蜂。恣意覓花心抱。

又 雨後魯東郊夕望此地舊魯遺宮人云其下有寶氣

顧天石

劍立空山。龍沉陡澗。閃爍電光餘紫。金銀夜氣。髣髴熒煌。只在疎林影裏。望去斷瓦頽垣。知是何王。故宮遺址。想濕苔黑月。精靈來往。相逢於此。入夜久。悄絕人蹤。隋囊螢火。散亂高低都是。蛇驚鴉墮。虎趁俚來。涼氣侵衣。髮指。何待金椀玉魚。耕出人間。淚如鉛水。歎北邙東郭。夢中猶幻。舊時朝市。

蘇武慢 元宵雪後作

曹實菴

皓魄初圓。罡風猶勁。剪破彤雲萬里。桂影扶疎。嫦娥清
冷。白玉樓頭似水。銀花作陣。火樹迷空。照見離離珠蕊。
想蜀天積雪。峨眉崖下。佛燈如此。何須問雙闕雲間。
六鷲海上。簫鼓聲中燕喜。竹葉橫窓。松陰滿徑。有個幽
人在裏。白眼誰同。青樽易歇。赤脚層冰遊戲。應難尋千
樹梅花。長笛一聲而已。

小梅花

晚次西口

吳子元

寒鴉亂。孤帆遠。雲低芳樹斜陽淺。晚霞明。布帆輕。浪圓
篙滑。兩岸暮山青。漸看人影波光裏。紅蓼灘頭漁唱起。
烟又迷。子規啼。獨自黃昏。明月照前溪。眠不得。篷窓

黑也。拚蕭索。天涯客。暗凝眸。數更籌。去年相送。剛只過
中秋。而今梅子青肥了。芍藥酴醿開太早。棟花殘。藕成
蓮。爭似東風。楊柳繫歸船。

洞庭春色

顧梁汾

粉蝶烏啼。紅橋雁齒。昔日亭臺。記墮釵聲裏。頻呼小玉。
鈎簾影畔。手摘青梅。感絕多情雙燕語。道三歲樓香人
未迴。心期在。休教結子。辜負重來。歡娛總隨流水。尙
依然位置。沒點塵埃。只淒涼禪榻。茶烟空颺。漂零酒社。
蠟淚成堆。一種幽尋春草句。怕清夢池塘有劫灰。長陪
着舊雕欄玉砌。花落宮槐。

沁園春

題陳其年烏絲集二首

龔芝麓

彼美何其繡口檀心。婉孌清揚。怪鬚髯如戟。偏成嫵媚。文章似海。轉益蒼茫。玳瑁爲簪。珊瑚作架。十五城償價未昂。朱絃發。聽短歌日短。長恨情長。無端雪涕歡場。儘潦倒荒迷事不妨。勝流黃思婦。鴛機組織。從軍蕩子。馬稍騰翔。有托而逃。是鄉可老。粉黛英雄。搃斷腸。君試問。彼癡人濟濟。誰似羚羊。

又

髯且無歸。縱飲新豐。歌呼拍張。記東都門第。賜書仍在。西州姓氏。複壁同藏。萬事滄桑。五陵花月。闌入誰家俠

少場。相憐處。是君袍未錦。我髯先霜。秋城鼓角悲涼。暫握手他鄉。似故鄉。况竹林賓從。烟霞接軫。雲間伯仲。宛雒褰裳。煖玉燕姬。酒錢夜數。縮髻風能障綠楊。才人福。看清平絲管。爛醉沉香。

又

贈別芝麓先生卽用其題烏絲詞韻

陳其年

雖則毋歸。對酒當歌。終難激揚。似孔家文舉。幼原了了。衛郎叔寶。晚更茫茫。五劇金鞭。六街寶馬。誰數吾家老子昂。公真誤。歎臣今老矣。髮短心長。御溝偶過毬場。笑塗轍都爲若輩妨。更內家髻樣。巧如馬墮。小侯舞勢。

快作鸞翔。酒則數行。食而三歎。斷盡西風。烈士腸。登城望。有千羣簾策。萬點牛羊。

又

歸去來兮。徑別公歸。輕帆早張。看秋方欲雨。詩爭人瘦。天其未老。身與名藏。禪榻吹簫。妓堂說劍。也笑男兒意氣場。真愁絕。却心憂似月。髻禿成霜。新詞填罷蒼涼。更暫緩臨岐。入醉鄉。况僕本恨人。能無剌骨。公真長者。未免褰裳。此去荆溪。舊名罨畫。擬繞蕭齋。種白楊。從今後。莫逢人許我。宋艷班香。

又 題陳其年烏絲詞

王西樵

屈指人間。咄咄惟君。跋扈飛揚。似波寒竟去。衣冠颯颯。燭昏欲醉。履舄茫茫。紅豆筵中。白楊齋外。哀艷無端。互激昂。憑人道。是秋墳唱苦。子夜歌長。廿年落魄名場。便歷落嶽崎也。未妨看禰生單絞。搗聲慷慨。陳王芋蔗。舞態廻翔。兒女情深。風雲氣在。同此牢愁。一寸腸。君無讓。信點如顧虎。狂比袁羊。

又 題董舜民蒼梧詞

王慕齋

咄咄董生。是謫仙人。而今再來。恍狂客愁多。不堪言恨。夜郎遷去。誰復憐才。淚點春雲。老吟秋月。風雨蒼梧絕。可哀。悲歌久。到燕南薊北。無限傷懷。蕭條獨上金臺。

歎駿骨龍媒安在哉。只一編繁露。爭相延致。千篇藎日。且共遲徊。震澤空濛。龍峯突兀。試展新詞。洞壑開。稱詞史。任青鞋布襪。赤日黃埃。

又 江夏懷古

史雲臣

漢水江深。此際憑高。中心慨慷。問何年帝子。鵲啼西蜀。幾人名士。龍卧南陽。火照空城。苔生故殿。當日渾疑古。戰場來遊處。見千門繡瓦。萬井銀墻。人間幾度滄桑。想兒女英雄。搃斷腸。歎周郎折戟。多情顧曲。曹公橫槊。遺恨分香。夏口旌旗。武昌樓櫓。遙望山川盡鬱蒼。無窮事。付殘楓衰柳。一片茫茫。

又

顧梁汾

殘月幽輝。宿昔見之。豈其夢耶。任寒堆一枕。鈿珠零落。塵縈半榻。箏柱欹斜。妾命如斯。郎行何許。裙扇留題滿。狹邪。鱗鴻便。莫棲香正穩。忘了天涯。也應遊倦思家。笑不抵孤眠人。歎嗟。鎮未忺懷抱。傭俚煖鴨。斷無消息。悶數歸鴉。雪壓霜欺。別來真個。瘦盡中庭萼綠華。誰傳語。道春風多厲。強飯爲佳。

又 李孔德出情人如玉所留指甲索賦

朱錫鬯

并剪分時。逗向君前。春心暗驚。記銀缸照處。曾挑錦字。

碧雲歎斷。尙擘霜橙。覆瓦彎環。層冰碾薄。只是中心最
不平。相思苦。任拋殘寶瑟。閒殺瑤箏。詩人慣惜傾城。
悵三疊陽關。萬里程。把香囊繫住。潛通叩叩。紅絲解罷。
低喚卿卿。猛省秦樓。纖纖指下。何得愁中。却盡生無眠
夜。想麻姑搔背。一段風情。

又 丁巳重陽前三日。夢亡婦淡粧素服。執手哽咽。
語多不復能記。但臨別時。有云。卿恨願爲天上
月。年年猶得向郎圓。素未工詩。不知何以有此
感賦。

成容若

瞬息浮生。薄命如斯。低徊怎忘。記繡榻閒時。並吹紅雨。
雕欄曲處。同倚斜陽。夢好難留。詩殘莫續。贏得更深哭。

一場遺容在。只靈飈一轉。未許端詳。重尋碧落茫茫。
料短髮朝來。定有霜。便人間天上。情緣未斷。春花秋葉。
觸緒還傷。欲結綢繆。翻驚搖落。減盡荀衣舊日香。真無
奈。倩聲聲隣笛。譜出迴腸。

又 味淚

黃以永

水漲秋霖。潮生銀海。泉湧春山。看香沾紅頰。露凝花萼。
軟收翠帕。珠走荷盤。鴛枕留嬌。玉壺藏恨。千古瀟湘竹
有斑。休零落。情情絲萬縷。顆顆勻穿。分明玉碎珠圓。
乍可向燈前。月下彈。記綠楊道上。吹綿共落。芭蕉窗外。
夜雨同寒。流恨無聲。驗愁有迹。粉帛輕勻。不教看。何時

住待河魚枯盡。紅蠟燒殘。

又題美人畫芙蓉

曹實菴

嬈嬈婷婷。何處折來芙蓉一枝。是青谿女士寫生妙手。花光粉膩。遊戲爲之。縱使無情。也應有恨。只白風清欲墮時。堪憐處。傍沙汀蘆岸。掩冉丰姿。多愁多病蛾眉。便畫出傷心寄阿誰。憶紅樓倦繡。輕拈小筆。烏絲罷咏。淡抹唇脂。更費雌黃。枝頭點染。添箇翩翩蝴蝶兒。吹能起。笑拂蠅成誤。老眼迷離。

又送友人北上

顧天石

君豈無歸。何故漂零。江天一涯。悵離亭對酒。偏逢雨雪。

故園庭樹。三見開花。鞦韆瓊車。曉催人去。欲往從之。霜似沙。凋盡柳。恨無枝可折。寄與君家。長安歲晚途遐。盼不上斜陽數點鴉。但碧雲紅葉。夢歸香閣。曉風殘月。人在蒹葭。我縱無情。爲君腸斷。况復今同出處耶。增別恨。是黃河古岸。明月悲笳。

又咏史

翁子負薪。甯戚飯牛。富貴何時。歎敝衣百結。纔遮短髻。破書一卷。徒撚吟髭。感慨英雄。當年落魄。不免區區負販嗤。腰間劍。枉衝星射斗。誰辨雄雌。朱輪夾道爭馳。擁纛下熊羆。十萬師。羨運籌指顧。聲搖山嶽。笑談露布。

草堂編卷四
氣懾鯨鯢。衣錦歸來。封侯萬戶。我輩他年定若斯。俱幻耳。看邯鄲夢斷。曉月迷離。

又入楚境

湓浦西來。路入蘄黃。吳楚之交。想山川壯麗。孫劉事業。烟雲變化。屈宋風騷。亂石穿空。驚濤拍岸。句有蘇髯逸興豪。秋容媚。更橙黃橘綠。掩映青袍。慙無斗酒雙螯。恨辜負寒江夜月高。聽波心撥刺。魚喧獺趁。山間響答。鶴唳猿號。清絕如斯。低徊焉往。三老長年愧汝曹。成何事。歎年過半百。漂泊江臯。

八歸 送錫鬯次史梅溪韻

沈融谷

芙蓉幕裏。薔薇亭下。來往每愛幽獨。無端啟事銅龍曉。夢想鴛鴦烟雨。棹歌誰續。破帽輕衫仍自好。已閒却溪山書屋。上巳過。我亦沉吟。日暮倚修竹。從此沿堤露柳斜。官烟草。輾轉離人愁目。半池魚浪。一枝斑管。寫盡怨紅沉綠。念人生得意。幾見斜陽挂喬木。但須記暮雲秋水。開了柴扉。伴鄰翁濯足。

賀新郎 和稼軒

張山來

化鶴歸來矣。看揚州。人民如故。風流無幾。聽說當年繁華處。占盡賞心樂事。真令我津津狂喜。此日邗關清夜月。想二分也覺都非是。更何必。論形似。閒情寄托殘

編裏把前人。相傳佳話。揣摩風味。大嚼屠門空惆悵。揭
破千張側理。翻惹得閒愁。蠶起。欲倩金樽消歲月。且由
他聾却鍾期耳。誰伴我。管城子。

又送陳其年之中州

龔芝麓

津柳霜飈發。乍分襟。驪駒一曲。鳳凰雙闕。黃菊丹楓猶
在眼。休悵紅亭吹笛。換幾度天涯圓月。酒醒夢回多少
事。感蕭蕭易水衝冠髮。姑脫穎。見其末。寶刀欲贈心
先折。筭古今。豐城龍劍。終爲神物。一任椎埋與屠狗。浪
許爛羊魁傑。那更記灰飛烟滅。此去夷門還鄭重。有滿
懷未老侯生血。須却掃。待三益。

又贈柳敬亭

鶴髮開元叟。也來看。荆高市上。賣漿屠狗。萬里風霜吹
短褐。游戲侯門趨走。向與我周旋良久。綠髻舊顏今改
盡。歎婆娑人似桓公柳。空擊碎。唾壺口。江東折戟沉
沙後。過青溪。笛床烟月。淚珠盈斗。老矣耐煩如許事。且
坐旗亭呼酒。拚殘臘消磨紅友。花壓城南韋杜曲。問毬
場馬稍還能否。斜日外。一回首。

又觀音門望大江

宋荔裳

絕壁啣飛閣。倚寒空。嶒嶸窈窕。是誰珞珞。六代興亡如
逝水。烟冷千尋鐵索。夢不到烏衣簾箔。結綺臨春歌舞

散。大江流尚遶青山郭。悲自語。簷邊鐸。滔滔東下風
濤作。俯危欄。龍鼉出沒。雲山歎薄。况是清秋明月夜。何
處樓船吹角。早驚起南飛鳥鵲。估客船從巴蜀下。看帆
檣半向青天落。吾欲醉。騎黃鶴。

又

尤展成

偶過慈仁寺。見門前五株松樹。婆娑盡矣。二十年來風
景換。不謂樹猶如此。感往事蕭條流涕。白髮青衫驅款
段。笑無端。貫酒荆高市。聽擊筑。悲風起。又逢佳節黃
花裏。悵登高。西山殘照。暮雲千里。極目齊州烟九點。家
在吳頭楚尾。添幾幅荒丘廢壘。漢寢唐宮何處問。只滔
滔不斷。渾河水。買一棹。吾歸耳。

又

唐濟武

皓月秋雲卷。大都來。埋憂天上。無愁堪遣。阮籍無端今
夕淚。潦倒臨岐頻泣。也依舊。蠶僵春繭。此地只堪拍手
笑。歎癡人痛哭。情何淺。從看取。兩眉展。彩毫鐵騎人
爭顯。任消磨。寒鴉古木。龜趺雲扁。風雨幾番人事換。憐
殺東門牽犬。笑輪囷無材終免。二十餘年驚尚在。爲拂
衣。早把青山典。蓬蒿徑。倩誰剪。

又悼亡

何省齋

秋雨多情者。却從人耳邊心上。瀟瀟潏洒。一片吳山烟

中樹攢簇眉峯難畫。聽入夜銀河如瀉。亂澗啼螿衝哀
雁似擣砧拋織淒涼話。愁欲買幾多價。布帆數向西
湖挂。每丁寧秦樓壓酒。蘇堤繫馬。昔日戲言今朝淚。和
雨一時同下。龍鍾袂有誰重把。無焰殘燈幢幢影。更濕
雲暗度酸風射。苟奉倩神傷也。

又 贈顧天石

曹秋岳

才子今無幾。向長途。茸裘跨馬。衝寒千里。醉拂霜毫吳
姬側。自解濁醪妙理。乍一見令人色喜。雲夢平吞看氣
槩。濯春江徐庾難爲綺。羈旅恨待君洗。當年曾進先
生履。悵推移。錦江烟月。筆床塵尾。有美英姿丹青翮。轉

憶牙籤堆几。便聯袂高歌不已。赤驥空羣誰曾識。筭盛
朝遺此無雙士。觴再進。客休矣。

又 陳健夫見贈所藏瑤華集謝之

孔振路

數卷貽冰雪。是先生。郵囊一片丹鉛心血。誰肯驪珠輕
割愛。爲賞知音情切。論好友如君稀絕。黃絹新詞全輟
贈。筭渭城奚啻歌三疊。吾樂甚。得明月。金河握手難
爲別。念西峯。草堂花影。唾壺敲缺。京洛無窮名下士。獨
數元龍高潔。偏向我倍增腸熱。鼓吹休明公等事。謝提
携共勗千秋業。須珍重。此瑤笈。

又 和以永舅瘦字韻

濃興方如酒。恨無端。春風惱亂。蘇州太守。一片梨雲留
住夢。試問卿還知否。真個是蕙心檀口。想必蘭香來下
界。引羣仙一笑皆迴首。春夜月。更如晝。三生石上無
還有。恐徒然。曉風殘月。暫時消受。歡到終場悲易至。怪
殺笛中楊柳。留取待他年懷舊。打併心魂都付與。願從
今閑却攀花手。那不令。休文瘦。

又烏江弔古

顧天石

酹酒烏江渡。問重瞳。英雄如此。天亡何故。有一范增不
能用。何況當年信布。敵手者漢家高祖。四百年來基業
在。有斬蛇神劍爲阿護。玉斗碎。竟何補。亡秦應讖須

三戶。把懷王。江心擊殺。失其根據。縞素興師名甚正。從
此目無全楚。真難向江東回顧。縱使渡人兼渡馬。料重
興霸業非朝暮。堪洒淚。弔千古。

又爲袁籜菴先生賦

張砥中

歲月留難住。歎回頭功名萬里。盡成塵土。我已銀絲生
雙鬢。何況秋娘眉嫵。待還問舊時歌舞。無限傷心言不
得。解金貂且醉青樓暮。歌乍闕。淚如雨。西風歷歷傳
更鼓。倩江頭。曉來鴻雁。漫催行路。十五年間天涯客。纔
是歸來一度。早又向北燕南楚。馬上濛濛寒雨下。指萬
山樹黑無人處。獨自箇。掉鞭去。

又塞上

丁飛濤

苦塞霜威冽。正窮秋。金風萬里。寶刀吹折。古塞黃雲迷
斷磧。醉卧海天空濶。况毳幕又添明月。榆歷歷兮雲
檝。只今宵便老沙場客。搔首處。髡如結。羊裘坐冷千
山雪。射鵰兒。紅翎欲墮。馬蹄初熟。斜鞞紫貂雙織手。擲
罷銀箏淒絕。彈不盡英雄淚血。莽莽晴天方過雁。漫掀
髯。又見水花裂。渾河水。助悲咽。

又咏俠士

孔西銘

血浸銀鋸碧。笑摩挲。腰間七首。萬人無敵。生不封侯虛
壯志。慚負燕山片石。天付與昂藏七尺。燕市韓廷軀可

借問一腔熱血誰人識。歲月逝。髡空白。曾經受術崑
崙客。化長虹。瞥然飛去。杳無蹤跡。十二重垣踰過處。風
雨如磐昏黑。渾不為黃金千鎰。挈取無雙還報命。與生
平知己酬恩德。縱刎頸。更何惜。

又

薄倖如斯矣。剝懷人。半襟紅淚。意中眼底。還怕侍兒偷
聽了。長歎數聲而已。閒消息歸來也未。誰警蘆汀孤雁
醒。聒愁腸。整片啞啞起。這種恨。沒頭尾。敢忘屏曲丁
寧事。教閒時。只憑咀嚼。相慰滋味。牽我神魂先去也。土
木形骸一例。願化作并州一七。索性愁絲都割斷。做連

環並影深閨裏。縱顛倒。也成對。

又 送阮亭東歸兼悼西樵

曹實菴

倦客歸轅里。恰三秋。霜林葉散。鯉魚風起。四角紅氍毹。子背。躑躅河橋之際。趁不上東華宵騎。三疊淒涼渭城曲。感平生清淚如鉛水。知我者。惟兄耳。重逢蕭寺人憔悴。憶君家中郎阿大。清言何綺。杳矣人琴千載恨。宿草吞聲未已。離緒到中年如此。生不成名身已老。歎虎頭食肉非吾事。空擊筑。長安市。

又 鴉陣

鴉陣來寒渚。逗輕寒。霜天一抹。晚紅如縷。掠下晴窓驚

帛裂。影逐斷雲歸去。伴黃葉蕭蕭亂舞。寒話空林飛且止。似商量。明日風兼雨。聲啞啞。倩誰訴。黃雲城畔知無數。趁星稀。月明三匝。一枝休妬。雁字橫斜。紛幾點。極目江村烟樹。惆悵煞。落霞孤鶩。啼向碧紗堪憶遠。最淒涼。織錦秦川女。空房宿。淚偷注。

又 亡婦忌日

成容若

此恨何時已。滴寒更。空堦雨歇。葬花天氣。三載悠悠魂夢杳。是夢久應醒矣。料也覺人間無味。不及夜臺塵土隔。冷清清。一片埋愁地。釵鈿約。竟拋棄。重泉若有雙魚寄。好知他。年來苦樂。與誰同倚。我自終宵成轉側。忍

聽湘絃重理。待結個他生知己。還怕兩人俱薄命。再緣
慳。剩月零風裏。清淚盡。紙灰起。

又 送傅舞音

黃以末

行矣君休歎。料塵埃。車輪馬足。相逢未遠。南北東西男
兒事。天水前程無限。君莫恨無人青眼。王粲不妨荆楚
客。任景升兒子。皆豚犬。但有酒。何妨勸。楓林落日黃
花晚。見先生。髯奴白馬。短衣長劍。行李蕭蕭從茲去。一
路柳堤花岸。齊國士。文章清健。前去若逢詩酒侶。道天
涯黃九吾曾見。長而黑。狂而狷。

又 雨花臺晚眺

顧梁汾

此恨君知否。問何年。香銷南國。美人黃土。結綺新粧看
未竟。莫報諸軍飛渡。待領畧。傾城一顧。若使金甌長怕
缺。筭繁華。千載成虛負。瓊樹曲。倩誰譜。重來庾信哀
難訴。是耶非。寶釵桃葉。舊消魂路。如此江山剛換得。才
子幾篇詞賦。弔不盡。人間今古。試上雨花臺上望。但寒
烟衰草。秋無數。聽嘹唳。雁行度。

摸魚兒

吳園次招集米山堂

曹秋岳

展瑤箋。近尋稽阮。開樽長倚修竹。乾坤落落存芒履。自
信了無拘束。春不足。最可惜芙蓉千點埋濃綠。遊踪待
續。看簾卷微波。堂深瘦影。清語漱寒玉。高歌後。槽底

梨花正熟。更闌四照銀燭。紅塵舊夢浮雲散。少壯去如
飛鏃。閑是福。莫喚起龜年重唱相思曲。新愁幾斛。只買
斷嬋娟。携多鑿落。相約卧空谷。

又題李武曾灌園圖

朱錫鬯

粉墻青。蚪檐百尺。一條天色催暮。洛妃偶值無人見。相
送襪塵微步。教且住。攜玉手。潛行莫使冰苔仆。芳心暗
許。認香霧鬢邊。好風衣上。分付斷魂語。雙栖燕。歲歲
窻紗飛度。阿誰花底催去。十年鏡裏樊川雪。空裊茶烟
幾縷。離夢苦。渾不識鎖香金篋歸何處。小池枯樹。筭只
有當年。一九冷月。猶照夜深路。

又自桃葉渡汎舟暮抵浦口投宿村店

憶歸時。白門楊柳。吹花糝滿香徑。重來化作青萍子。宛
似客遊無定。呼小艇。擬有分桃根。桃葉行相並。雲廊藻
井。枉費却臨流。紅欄千百。不見玉人凭。西郊路。十里
柔波如鏡。石城高下殘景。江豚多事頻吹浪。只怕落潮
風猛。斜又整。信一葉輕舟。幾幅蒲帆影。人家烟冷。傍急
雨長蘆。昏鐘古岸。漁火隔窻暝。

又西直門外作

曹寶菴

北邙邊。高低丘壠。縱橫無數羊虎。玉魚金椀何時葬。又
見斷碑如礎。魂自語。須認取文章功業難憑據。白楊老

樹戰一派秋聲。向人頭上。颯颯作涼雨。西州路。敗笠
青衫。羈旅。緇塵撲面來去。黃蘆苦竹。千秋恨。都付紙錢
飛處。天已暮。想入夜雲。旗風馬精靈度。荒涼三戶。共塚
上狐狸。山中木客。同結歲寒侶。

又寄贈史雲臣

繞荆溪。數間茅屋。竹山舊日曾住。吟花課鳥。無遺恨。領
袖詞場南渡。逐電去。淒感煞。哀絳翠管。紅牙譜。湖山如
故。又幻出才人。鏤水繪影。抒寫斷腸句。鷓絃上。彈入
蜨菴金縷。平分鬢客。旗鼓。搓酥滴粉。方成調。偷換羽聲
淒楚。推獨步。須信道。秦黃蘇陸。無今古。江東日暮。想席

帽風歌。春衫雨濕。行過翠藤路。

又隋宮

顧天石

遶雷塘。烟橫霧鎖。紛紛落葉難掃。繡衣灰燼。前朝事。不
忍手披香草。風月好。彷彿聽珊珊。環珮歸來早。江都夢
杳。不記得芳魂。幾時埋却。暗共青山老。迷樓址。改作
梵王宮了。晨鐘暮鼓。空闌。路傍石馬。雙雙卧。贏得幾人
憑弔。螢漸少。看滿地青燐。還似魚燈照。千年華表。縱化
燕歸巢。故宮難覓。紅淚泣霜曉。

又讀宋史

杜鵑啼。不如歸去。汴梁宮殿休矣。百官南渡。規模小。占

得西湖十里。和議起。揮不住金牌十二將軍淚。生還二
帝。併痛飲黃龍。燕雲唾手。坐失此機會。南朝事。偏安
不多日耳。年年四野多壘。到頭趙氏無乾土。付與汪洋
海水。忠義士。傷感煞冬青麥飯西臺記。六陵無主。又幾
度秋風。羅平怪鳥。叫徹夕陽裏。

又

傅舞音

又天涯送春雨歇。芳洲綠漲痕晚。殘紅落粉輕寒細。渺
渺魚紋平軟。長堤畔。正帆卸新晴。謝客登臨倦。停橈古
岸。對淨綠羞窺。湔裙誤約。一望水天遠。橫塘事。烏柏
門前路轉。紅鱗屢緘新怨。灣頭曾理東風鬢。記得蘋香

輕捲。前遊斷。望隔市昏烟。點點檣燈亂。凌波不見。聽拍
岸春濤。打篷香雪。橋外夜風戰。

又臺庄夜泊

最無端。閒愁萬種。依依春去時候。長堤草色歸途遠。却
恨孤帆滯久。紅橋口。又酒市青帘。風絮飄襟袖。高樓垂
手。正市過櫻桃。汀翻荷葉。一醉喚春酒。雙蓬鬢。自悞
西園約後。年年秋縷微有。落花書到知心病。豈料天涯
輕負。津亭柳。看弄水蘋烟。隔浦成消瘦。相思寫就。漫立
向烟波。誰家燕子。剪剪拂寒皺。

又悼小史

史雲臣

正堪憐。回橋烟柳。腰肢暗想楚楚。歌喉長憶當筵逞。淪落今歸黃土。江上路。空望斷。杜鵑聲裏無歸處。怨春無語。任無賴東風。幾番作惡。零亂捲飛絮。思前事。携手長堤日暮。曲終人醉南浦。梨花昨夜枝頭好。還似掌中相覩。寒食雨。只落得孤墳夜掩青松樹。舞衫拋去。領幾隊笙歌。夜臺供奉。猶唱斷腸句。

金明池

秣陵懷古

戈山夫

斷雁西風。瘦驢黃葉。又是關門日暮。仙梵度清涼山寺。對鳳闕。絳雲留處。見長干寶塔。翠飛。搃閱盡天界茫茫。塵土。任沽酒岡南。壩頭人老。莫問少年歸去。裙屐風

流歎如許。便畫面熏衣。擁囊揮塵。倚司馬長城。却敵。空惹得春燈燕語。再休言六代繁華。與半壁乾坤。殘棋孤注。想虎踞龍蟠。江山形勝。都付冷烟疎雨。

又 燕京歲暮懷古和申隨叔

朱錫鬯

西苑斜樓。南城獵騎。幾處笳吹蘆葉。孤鳥外生烟夕照。對千里萬里積雪。更誰來擊筑高陽。但滿眼花豹明駝。相接。剗夜火樓桑。秋塵石鼓。陌上行人空說。戰鬪漁陽。何曾歇。笑古往今來。浪傳豪傑。綠頭鴨。悲吟未了。白翎雀。醉歌還闕。數燕雲十六神州。有多少圍陵。頽垣斷碣。正石馬嘶殘。金仙淚盡。古水荒溝寒月。

又金陵懷古

沈偶僧

麾扇風前。投鞭江畔。見說龍蟠虎踞。談笑裏蒼生未起。只賭奕山頭飛渡。問官家世世生來。要不及盧家。莫愁何故。看幕府頻移。鑿輿潛幸。一片旌旗颺去。江上鼓鼙聲斷處。便鐵鎖千尋。樓船無數。共王謝巷口烏衣。還講個舊時門戶。儘寒潮猶帶斜陽。似六代興亡。落花飛絮。但結綺臨春。盡成野草。誰唱後庭玉樹。

又咏夏雲多奇峯

孔振路

峯嶽奇峯。縱橫四起。頓失寥寥平野。羲輪駐陽威未斂。金石爍沸濤猶瀉。見連山拔地玲瓏。似五岳圖形。倩誰

描寫。豈蕭索輪囷。白衣蒼狗。所能彷彿擬者。更上一層高處望。正雨脚斜飛。如繩纚纚。東天畔蒼龍尙偃。西天畔彩虹先掛。向空中電掣驚蛇。恍玉女投壺。靈旗照夜。又變滅須臾。殘霞數道。燒得晚山如赭。

青衫濕遍

成容若

青衫濕遍。憑伊慰我。忍便相忘。半月前還扶病。剪刀聲猶在銀缸。憶生來小膽怯空房。到而今獨伴梨花影。冷冥冥儘意淒涼。願指魂兮歸路。教尋夢也迴廊。咫尺玉鈞斜路。一般消受。蔓草殘陽。判把長眠滴醒。和清淚攪入椒漿。怕幽泉還爲我神傷。道書生薄命宜將息。再

休耽怨粉愁香。料得重圓密誓。難禁寸裂柔腸。

白苧

徐子凝

冷悽悽。小樓外月明風細。玉尊酒滿。此際與誰同醉。紗
窗閉。爐香燒罷自孤睡。展轉不成眠。又怨道涼生羅袂。
黯然無語。暗裏自彈雙淚。那堪他陰蟲唧唧。鳴荒砌。
提起柳下相逢。花間密約。如塵似雨。歷歷舊情能記。正
剪紙題詞。指燈作誓。綠羅窻曉。見釵梁墜枕。粉痕在臂。
剗地分飛。忍便將伊真個拋棄。好倩秋鴻。再把香牋寄。

蘭陵王

九日登高

曹子清

縞衣鶴。重赴千年舊約。臺城路。烟草換人。此日江山淚

雙落。秋心無處着。陡起孤雲一角。西風裏潮去浪來。多
少征帆度寥廓。誰妨客行樂。禁一陣郎當天半風鐸。
金輪倒射浮屠脚。怕平楚寒淡。酒人無賴。又悔題糕字
屢錯。黃花笑難索。飄泊。怎忘却。筭烏遶江門。柳圍京
洛。紅塵綠水三生各。是少年蹭蹬。風流擔閣。頭顱尚在。
且掉臂。共行樂。

浪淘沙慢

顧天石

夜寒凝。孤燈舊館。戶擁殘雪。小飲旗亭乍歇。徵歌北里
初闌。皎如鏡南樓斜掛月。過燈市銀漏方徹。念此際。有
誰共攜手。天街玩清絕。疎濶。情人渺若天末。記翠袖

熏香對攏處。曾把盟誓說。想人生最苦。惟是輕別韶年
易失。照菱鑑空歎滿頭華髮。倚闌干唾壺敲缺。夢迷路
画樓怎覓。藍橋水茫茫怒濤咽。佇想月榭露臺歡會處。
能禁幾度青衫濕。

大酺

曹實菴

正酒船行人聲寂。好月如珪相照。鷓絃初入破。響風箏
刀尺。麻姑手爪。銀甲徐調。水絲輕撥。啄木丁丁林鳥空。
山無人處。任花開花落。洞天深宵。忽變作玉關。千羣鐵
馬。平沙衰草。吳儂歌縹渺。歎舊曲誰似臨川好。遮莫
向岐王筵上。崔九堂前。琵琶彈出傷心調。未抵繁絃巧。

引蝶翅蜂鬚繁遶。但羈客青衫老。奈何頻喚。頓減中年
懷抱。鬢邊明日白了。

西平樂

陳其年

象管慵拈。鵝笙懶炙。春困斜倚圍屏。往事難追。舊愁易
惹。更添夜雨淋鈴。記一騎衫痕似血。半夜簾紋如水。鳳
凰橋上吹簫。蝦蟇陵下呼鷹。幾處鞦韆淥水。風弄影。篩
碎碧潭星。秋娘一去。酒徒何處。萬水千山。有影無形。
縱有日重遊洛下。再過秦川。鶴髮相逢話舊。覓遍樓臺。
祇剩寒鴉與亂螢。十載浮名。半生故國。且剩閒身。野寺
山家。布襪青鞋。花前到處漂零。

多麗

黃以永

倚東風。一簾花雨濛濛。最無端。垂楊纔碧。杜鵑又叫殘紅。謫仙歸鳳凰臺古。佳人去燕子樓空。砌草凝香。苔根泣露。還似人生一世中。記當日朱鞍駉馬。銀杏小橋東。耐思量。旗亭酒煖。妓館香濃。笑年來。春風依舊。一樽魯酒誰同。伴淒其一鈞冷月。送寥落幾個歸鴻。千里相思。十年恨事。春愁滿紙寫難工。算只有清宵好夢。尋得舊遊踪。還恐似暮雲晻靄。朝霧朦朧。

玉女搖仙珮

望春樓故邸

丁飛濤

青州城裏。帝子珠樓。縹渺五雲深際。繞柱鮫綃。穿簾玳

瑁。舊是繁華朱邸。誰意同流水。見移花月檻。落榆鋪地。瑤階外。鳥聲啾唧。雨洗遺鈿。數點空翠。何處玉簫聲。暗想當年。玉容同倚。樓上望春如醉。風斷窻紗。燕子卸將花蓋。鬪草踏青。昭陽人去。冷落鞦韆佳會。飛絮連天起。笙歌杳。不道岐王故第。祇見得空梁蛛網。粉墻蝶鬧。但餘幾點看花淚。不如把鳳樓長閉。

又題岳陽樓吹笛圖

顧天石

洞庭湖上。倒插芙蓉。搖漾一天空翠。雁落平沙。鷺飛南浦。極目清秋無際。莫向危欄倚。怕蛟宮龍國。下臨無地。波濤外。片帆出沒。幾點寒鷗。欲聚還碎。鶴髮老仙翁。一

笛梅花韻從空起。有客登臨到此。耐可乘風直上廣
寒宮裏。漢女宓妃呼之或出。冷艷鏗鏘珠珮。遺跡存有
幾。三閭恨。只逐斜陽逝水。止聽得山鷓嘯雨。林猿啼竹。
滿江都是湘娥淚。且沽酒岳陽沉醉。

夜半樂

秋夜觀演長生殿劇

孔西銘

浮雲過眼成夢。繁華一瞬。常自傷今古。記翠遶珠圍。夜
深私語。細風乍冷。長生殿角。驀聞宮監傳呼。念奴何處。
笑語向翩翩。翠盤舞。但教梅妃寂寞。虛賜珍珠。問誰
買賦。賜浴罷。還歸沉香亭去。范陽兵起。霖鈴夢斷。馬嵬
一片香魂。尙驚鞞鼓。風剪碎霓裳舊歌譜。到此枉對

劍閣梧桐。淚流如注。縱後約釵鈿杳無據。悵雙星可能
照見蓬萊路。思往日歡會成塵土。斷魂縹渺江天暮。

哨遍

簡施愚山

丁飛濤

長嘯歸來。自愛吾廬。無恙菰蒲裏。歷崎嶇。霜雪滿頭歸。
青山笑人還是。君不見。管寧但存皂帽。棄家浮海能逃
世。又不見。虞翻青蠅作客。願得一人爲知己。與子西去
歷崦嵫。更南涉蒼梧與九疑。彈琴命詩。鸞吟猿躍。差爲
快意。嗟予尙何依。江湖淼淼出天際。夙慕洪崖子。有
是夫吾與爾。石上據胡床。高歌散髮。仰天目送飛鴻起。
是故態狂奴。唾壺敲缺。一觴一咏同醉。念人生聚散能

幾時。復相對唏噓。欲何爲。但煩冤。徒作憂耳。芒鞋布襪。瓢笠。更掛筇竹杖。遍遊五岳。縱觀滄海。畢我生平之志。側身天地。竟何之。况眼中吾且老矣。

戚氏 本意

孔振路

舊新豐。泗上亭長是英雄。劍斬白蛇。黃昏鬼母泣途窮。呂雉正相從。芒碭雲起識真龍。重瞳又開霸業。兩雄相厄。苦交鋒。室家離散。倉皇作質。栝羹幾及而翁。幸鴻溝分據。妻孥歸趙。散楚成功。深宮兒女情鍾。薄姬管趙。艷冶競爲容。總不似戚姬年少。擅寵房櫳。正歡濃。母愛子抱。趙王圖嫡。呂氏悲恫。巧計留侯。邀來圍綺。陰謀一

且成空。羽翼儲皇定。數行泣下。慷慨歌風。隆準原來英主。把柔情枕簟。摠銷鎔。他年龍去鼎湖。權歸野雉。愛子先遭醜。永巷裏去。眼還燠耳。如花貌衣赭。春殘。圍中人。薨啼紅。便殘香揉碎了。無踪。至今空想。玉驅纖指。照夜玲瓏。

丁卯冬徐州李泉後畢識



